



Inatsisartunut ilaasortaq Aqqaluk B. Egede, Inuit Ataqtigiit
/Maani

**Perorsaasut akissarsiaat pillugit § 37 naapertorlugu apeqqummut 240-2019-
imut akissut**

Allakkap ullua: 18-07-2019
Suliap normua.: 2019-16478

Asasara Aqqaluaq B. Egede

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

Apeqqutinnut Inatsisartut suleriaasianni § 37 naapertorlugu apeqqutigisannut qujanaq.
Apeqqutita ataani ataasiakkaarlugit issuarneqarput, tamassumalu kingorna akineqarlutik.

Aallaqqaasiut

Perorsaasoqarnermi ullumikkut ukioq tamaat piffissaq tamaat atorfiit 556-iupput, agguarneqarlutik ulloq unnuarlu angerlarsimaffinni 177-it, ulluunneranilu paaqqinnittarfinni 379-it (arnat amerlanerupput 89-90 %-iullutik ukioqassutimilu 40-50-inik ukiullit 35 %-it missaaniipput. Amerlanersaat Kommuneqarfik Sermersuumi atorfeqarput ukioq tamaat piffissaq tamaat atorfiit 250-iullutik.

Ulluunerani paaqqinnittarfinni aqutsisuunngitsunut ukiumut agguaqatigiissillugu akissarsiat 277.000 kr.-upput aqutsisunullu 342.570 kr.-ullutik.

Ulloq unnuarlu angerlarsimaffinni aqutsisuunngitsunut ukiumut agguaqatigiissillugu akissarsiat 378.000 kr.-upput aqutsisunullu 583.300 kr.-ullutik. Ulloq unnuarlu angerlarsimaffinni agguaqatigiissillugu akissarsianik qaffaasut tassaapput pigaartuunermi il.il. akissarsiat ilaat allanngorartut.

Isumaqtigiinniarnerni kingullerni perorsaasut 1. april 2016-imit 31. marts 2020 tungaanut atorneqarsinnaasunik katillugit 7,7%-imik angusaqarput, tunngaviumillu akissarsiaat 3,75 %-imik qaffallutik. Perorsaasup ilinniarnerninik naammassinneqqammersup aallaqqaasiutaasumik ulluunerani paaqqinnittarfinni sulisup akissarsiai akunnaallisarlugu qaammammut 21.000 kr.-nik aammalu ulloq ulloq unnuarlu angerlarsimaffinni sulisup qaammammut 21.250 kr.-nik annertussuseqarput. Kingulleq taaneqartoq akissarsiat ilaat allanngorartut ilanngunnagit.

Apeqqut 1

Meeqquvinnit perorsaasut tunngaviumik aningaasarsiaasa perorsaasutut ilinniarsimasut akissarsiaqartinneqarnerini akissarsiat inissisimaffiini annerpaamik ataatsimut akissarsiallit ataanni akissarsiaqartittussanngorlugit inissinneqassappata kommuninut qanoq aningaasartuutaanerulissava?

Akissut:

Perorsaasunut nalinginnaasunut akissarsiat inissisimaffii tassaapput 32-33-35-37 aammalu ulluunerani paaqqinnittarfinni aamma ulloq unnuarlu angerlarsimaffinni

sulisuunerat apeqqutaanani. Atorfik apeqqutaalluni tapit assigiinngillat. Ukiumi ataatsimi akissarsiat tamarmiusut akissarsiat ilaannut piffissani nikerartuni sulinerni ilaatigullu qaangiuttoornerni pissarsiarineqartunit aamma sunnerneqarput.

Perorsaasut tamarmik akissarsiat qaffassusissaasa annertunerpaaffianiilertinneqassappata ukiumut ataatsimut katillugit 9,5 mio. kr.-t missaannik aningaasartuuteqarnerulertoqassaaq. Kommunit taakkunannga aningaasartuuteqarnerulernerat 6 mio. kr.-t missaani annertussuseqassaaq.

Oqaatigineqassaaq aningaasanik aaqjissuussinerup taamatut allanngortinneri sulisut akissarsiatigut iluaquteqarsinnaajunnaarnerannik imaaliinnarluni kinguneqartussaassaaq annilaangassutigineqarsinnaavorlu inuussutissarsiutit immikkoortuini taakkununnga assingusuni assinganik qaffaasoqarnissaanik piffissami sivilunerusumi kissaateqartoqalersinnaasoq.

Apeqqu 2

Perorsaasut ilinniarsimasut ataatsimut aningaasarsiaasa aningaasat pisissutigineqarsinnaanerisa allanngoriartornerannut sanilliullugu qanoq "katataaqatigippat"?

Akissut:

Apeqqu taamaattoq akissagaanni piffissap sorliup misissorneqarnissaa kissaatigineqassanersoq aalajangernissaa pisariaqarpoq. Perorsaasut isumaqatiginninniarnermi kingullermi sulisut immikkoortuinit ilinniakkap qaffasissusianik sanilliunneqarsinnaasumik ilinniagaqartunit allanit qaffasinnerusumik akissarsiatigut atugassaqartinneqarput. Ukiuni taakkunani marlunni januarip 2017-ip aamma januarip 2019-ip akornanni atuisartunut akigititaq taamaallaat 1,1 %-imik qaffappoq. Taamaammat akissarsiat qaffaassutaat isumaqatigiissutigineqartut, akissummi uani aallaqqaasiinermi allaaserineqartut perorsaasut piffissami isumaqatigiissusiorfigineqartumi perorsaasunut akissarsiat pisissutaasinnaanerisa annikinnerulersimanerannik isumaqassalluni tunngavissaqanngitsutut isikkoqarpoq.

Apeqqu 3

Akit nikikkiartornerannut perorsaasut ilinniarsimasut aningaasarsiaat naapertuussarneqarsimasuuppata perorsaasut ilinniarsimasut ataatsimut aningaasarsiaat qanoq annertutigisumik qaffasinnerutigissagaluarpat?

Akissut:

Apeqqu 2-mut akissut innersuussutigineqarpoq.

Apeqqu 4

Akissarsiat inissisimaffiat skalatrin 41-42-44-45 naapertuuttumik meeqqerivinni perorsaasut ataatsimut assigiimmik aningaasarsiaqalersinneqassappata Naalakkersuisut aporfilersuinissaminut tunngavissaqarpat?

Akissut:

Akissarsiat qaffaassutissaattut taaneqartoq annertooujussuussaaq aammalu akissarsianik aaqjissuussineq akisussaaffinnik piginnaasanillu takutitsisoq pigiinnarniarlugu mellemladerit aqutsisullu ataatsimut qaffaaffigineqarnissaanik pisariaqartitsilissalluni. Taamaammat taamaallaat perorsaasunut taamatut qaffaaneq

Nunatta Karsianut kommunillu aningaasatigut annertoorejussuarnik kinguneqartussaassaaq.

Tassunga ilanngunneqassaaq sulisut immikkoortuisa allat taassuma assinganik akissarsiatigut pitsanngorsaaffigineqarnissamik piunasaqaateqaleriaannaanerat. Tamanna ataatsimut isigalugu akissarsiat qaffakkiartornerannik aningaasaqarnermik politikkip imminnut nappassinnaassusiata annikillisinneqarneranik kinguneqartussaassaaq.

Naalackersuisut isumaqarput akissarsiat namminneq immikkoortumi tassani sulisunik amigaateqarnerup aaqqiivigineqarnissaanut annertuumik tapersiinaviangitsut. Taamaammat aningaasartuutaanerulersut sulisussarsiortarnermut sulisullu sulisoriinnarneqarnerannut pitsaasumik sunniuteqartitsinissamut sutigulluunniit naapertuunnaviangillat.

Naalackersuisulli ataatsimut isigalugu isumaqarput perorsaasut kattuffiat isumaqatigiinniarsinnaatitaasoq NPK tassaasoq isumaqatigiissutit pitsanngortinnissaannik piunasaqaateqartussaasoq kissaateqarlunilu, taamaalilluni taakku taamaalillutik isumaqatigiissutinik isumaqatigiinniarsinnaanermik aaqquissuussinermi nalinginnaasumi ilanngunneqarsinnaallutik.

Apeqqu 5.

Naalackersuisut allaanerusumik tunngavilersuutinik pingaarutilinnik meeqqerivinni perorsaasut aningaasarsiaasa qaffanneqarnissaat pillugu oqaasissaqarpat?

Akissut:

Perorsaasut akissarsiaat sulinermilu atugassarisaat pillugit § 37 naapertorlugu apeqqummut nr. 2018-242-mut akissut innersuussutigineqarpoq.

Naalackersuisut annertunerusunik oqaaseqaatissaqanngillat.

Inussiarnersumik inuulluaqqusillunga


Vittus Qujaukitsoq